

Kutambua Umiliki wa Mungu

*Sheria ya kinywa chako ni njema kwangu, Kuliko maelfu ya dhahabu na fedha—
Zaburi 119:72.*

Maneno ya mtunga zaburi, “Sheria ya kinywa chako ni njema kwangu, Kuliko maelfu ya dhahabu na fedha” Zab. 119:72, hueleza kile kilicho ukweli kutoka mtazamo tofauti na ule wa kidini. Yanaeleza ukweli halisi tena ambao unakubalika katika ulimwengu wa kibiashara. Hata katika zama hizi za kupenda kupata fedha, wakati ambapo ushindani ni mkali mno, na njia za kibiashara hazijali maadili, bado inatambulika kwamba kwa kijana anayeanza maisha, uadilifu, juhudi, kiasi, usafi wa kitabia na uwekevu ni mtaji bora mno kuliko kiasi chochote cha fedha....

Kile kilicho katika msingi wa uadilifu wa kibiashara na wa mafanikio ya kweli ni kutambua umiliki wa Mungu. Muumbaji wa vitu vyote, ndiye hasa mwenye mali. Sisi tu mawakili Wake. Vyote tulivyo navyo ni amana kutoka Kwake, ili vitumike kulingana na maelekezo Yake.

Hili ni jukumu alilo nalo kila mwanadamu. Linahusu shughuli zote za mwanadamu. Kwamba tunalitambua au la, tu mawakili, tuliopewa na Mungu talanta na vifaa, na kuwekwa duniani ili kufanya kazi aliyopanga.

Kila mtu amepangiwa “kazi yake” (Marko 13:34)—kazi ambazo stadi zake zinaendana nazo—kazi ambayo italeta manufaa makubwa kwake na kwa wanadamu wenzake, na kuleta heshima kubwa kwa Mungu.

Hivyo biashara yetu au wito wetu ni sehemu ya mpango mkuu wa Mungu, na ilimradi inafanya sawasawa na mapenzi Yake, Yeye Mwenyewe atawajibika na matokeo yake. “Wafanyakazi pamoja na Mungu” (1 Kor. 3:9), sehemu yetu ni kufuata maelekezo Yake kwa uaminifu. Hivyo hakuna nafasi ya kuwa na hofu. Bidii, uaminifu, kujali, uwekevu, busara vinahitajika. Kila nyanja ya akili itumike kwa kiwango chake cha juu kabisa. Lakini tegemeo halitakuwa katika matokeo ya jitihada zetu, bali katika ahadi za Mungu. Neno lililowalisha Waisraeli jangwani na kumtegemeza Elia wakati wa njaa, lina nguvu ile ile hata leo. “Msisumbuke, basi, mkisema, Tule nini? Au Tunywe nini?” (Mathayo 6:31)....

Yule ambaye anawapa watu uwezo wa kupata mali, ameunganisha zawadi na wajibu. Kwa vyote tunavyopata anadai sehemu bayana. Zaka ni ya Bwana.... “Leteni zaka kamili ghalani” (Malaki 3:10) ni amri ya Mungu. Hakuna matakwa yanayowekwa katika shukrani na ukarimu. Hili ni suala la uaminifu wa kawaida. Zaka ni ya Bwana; na anatutaka tumrudishie kile kilicho Chake.

“Hapo tena inayohitajiwa katika mawakili, ndiyo mtu aonekane kuwa mwaminifu” (1 Kor. 4:2). Kama uaminifu ni kanuni muhimu ya biashara, je hatupaswi kutambua jukumu letu kwa Mungu—jukumu ambalo ndilo msingi wa mengine yote? (Elimu, uk. 107–109).